



2000 жылы қыркүйек айының 29 жұлдызы, жұма күні Кеңсай бейітінде Нағашыбай Аманғалиұлы Шәйкеновтың қабіріне құлпытас қойылу рәсімі болып өтті.

Қабір басына Н.А. Шәйкеновтың жанұясы, туған-туыстары, дос-жарандары, әріптестері, соңғы үш жыл бойы ректорлық қызметін атқарған Заң академиясының басшылары мен шәкірттері жиналды.

Құлпытастың ашылу рәсімін академия ректоры М.С.Нәрікбаев кіріспе сөзбен бастады. Н.А. Шәйкенов аруағына бағыштап қасиетті құран сүрелері оқылған соң ҚР Жоғары соттың төрағасы Қ.Ә.Мами, ҚР Әділет министрі И.И.Рогов мырзалар ортамыздан мезгілсіз ажал алып кеткен Н.А.Шәйкеновтың жарқын бейнесі мен өмір жолы жайлы әріптестік тұрғыдан ой толғады.

Академия профессоры Г.Б.Ханның құлпытасқа байланысты философиялық толғаулары, студенттер қауымы атынан сөйлеген Ғ.Оспанқұлов пен А.Әбішевтардың ұстазға деген сезімдері адам жанын тебіренерлік мұңға толы болды.

Құлпытастың авторы, мүсінші Мұрат Біләловтің өңделмеген қызғылт граниттен жасаған композициясы марқұмның ерте қиылған өмірі және орындалмай қалған арман-мақсаттары, қақ айырылған тастың ортасынан түсіп тұрған күн сәулесі мен тастың оң жақтауындағы бүршік атқан нәзік жапырақ бейнесі марқұмның соңында қалған ұрпағы мен шәкірттеріне артқан үзілмес үміті іспетті.

Нағашыбай Аманғалиұлының жесірі Лидия Алексеевна жарын еске алып, үлкен толқумен, жиналған көпшілік қауымға отбасының атынан алғысын білдірді. Бүкіл қала алақанға салғандай боп көрініп тұрған Кеңсай төбесінде Нағашыбай Аманғалиұлының басына қойылған құлпытас, марқұм көзінің тірісінде жақсы көретін райхан гүлдеріне оранып, мәңгілікке қала берді.

*Тәрбие бөлімінің бастығы Амангелді Мұқан*